

四庫全書

史部

欽定四庫全書

文獻通考卷五十四

鄱陽馬端臨貴與著

職官考八

學士院

學士之職本以文學言語被顧問出入侍從因得參謀
議納諫諍其禮尤寵而翰林院者待詔之所也唐制乘
輿所在必有文辭經學之士下至卜醫技術之流皆直

於別院以備宴見而文書詔令則中書舍人掌之自太宗時名儒學士時召以草制然猶未有名號乾封以後始召文士元萬頃范履冰等草諸文辭常於北門候進止時人謂之北門學士中宗之世上官昭容專其事元宗初置翰林待詔以張說陸堅張九齡等為之掌四方表疏批答應和文章既而又以中書務劇文書多雍滯乃選文學之士號翰林供奉與集賢院學士分掌制詔書勅開元二十六年又改翰林供奉為學士別置學士

院專掌內命凡拜免將相號令征伐皆用白麻其後選用益重而禮遇益親至號為內相又以為天子私人元克其職者無定員自諸曹尚書下至校書郎皆得與選入院一歲則遷知制誥未知制誥者不作文書班次各以其官內宴則居宰相之下一品之上憲宗時又置學士承旨唐之學士弘文集賢分隸中書門下省而翰林學士獨無所屬

致堂胡氏曰國家陟降多士當出於中書中書有

私徇小則詰責大則黜削可也不當疑其專而分其權翰林初置人才與雜流並處其後雜流不入職清而地禁專以處忠賢文章之士然有天子私人之目內相之稱則非王政設官之體矣王者無私豈云私人相無不統豈云內相是與大臣自設形迹為異同也進退輔弼既與之謀安知無請託之嫌小人處之附下罔上安知無賣主之事故君道公而已矣或曰文章之用至衆中書門下之職

至重勢有不得兼也故必委之翰林不可廢也曰
自太宗高宗時尚未有此不聞之事武氏聚華藻
輕薄之人於北門而中宗以宮婢主文柄是何足
法者不必遠稽兩漢上法三王直取則於貞觀則
於所損益可知矣

石林葉氏曰唐翰林院在銀臺之北乾封以後劉
禕之元萬頃之徒時宣召草制其間因名北門學
士今學士院在樞密院之後腹背相倚不可南向

故以其西廊西向為院之正門而後門北向與集英相直因榜曰北門兩省樞密院皆無後門惟學士院有之學士朝退入院與禁中宣命往來皆行北門而正門行者無幾不特取其便事亦以存故事也

又曰唐翰林院本內供奉藝能技術雜居之所以辭臣特書詔其間乃藝能之一爾開元以前猶未有學士之稱或曰翰林待詔或曰翰林供奉如李

太白猶稱供奉自張垞為學士始別建學士院於翰林院之南則與翰林院分而為二然猶冒翰林之名蓋唐有弘文館學士麗正殿學士故此特以翰林別之其後遂以名官訖不可改然院名至今但云學士而不冠以翰林則亦自唐以來沿襲之舊也

容齋洪氏隨筆曰白樂天渭村退居寄錢翰林詩敘翰苑之親近云曉從朝興慶春陪宴栢梁分庭

皆命婦對院即儲皇貴主冠浮動親王轡鬧裝金
鈿相照耀朱紫間熒煌毬簇桃花騎歌巡竹葉觴
窪銀中貴帶昂黛內人粧賜楔東城下頒酺曲水
傍罇疊分聖酒妓樂借仙倡蓋唐世宮禁與外庭
不至相隔絕故杜子美詩戶外昭容紫袖垂雙瞻
御坐引朝儀又云舍人退食收封事宮女開函近
御筵而學士獨稱內相至於與命婦分庭見貴主
冠服內人黛粧假仙倡以佐酒他司無此也

晉天福五年詔翰林學士院公事宜並歸中書舍人自是舍人書直者當中書制夜直者當內制至開運元年復詔翰林學士與中書舍人分為兩制各置五員

宋翰林學士掌內制制誥赦敕國書及宮禁所用之文辭凡后妃親王公主宰相節度使除拜則學士草詞授待詔書訖以進赦降德音則先進草大詔命及外國書則具本稟奏得畫亦如之凡拜宰相或事重者宣召面諭旨則給筆札書所得旨稟奏歸院具辭以進餘遣內

侍授中書省熟狀亦如之若已畫旨而有未盡則論奏貼正乘輿行幸則侍從以備顧問有所獻納則請對或奏對凡初命為學士皆遣使就第宣詔旨召入院淳化二年以翰林學士賈黃中蘇易簡同知京朝官考課李沆權判吏部流內銓故事學士掌內庭書詔指揮邊事曉達機謀天子機事密命在焉不當豫外司公事蓋防纖微間或漏省中語故學士院常在金鑾殿側號為深嚴自國朝太祖以來藉其才用始令判三銓及知太常

禮院事天聖元年詔學士遇隻日至晚出宿蓋故事以
雙日鎖院隻日降麻也隆興改元詔學士及經筵官內
宿稍復祖宗故事

石林葉氏曰學士院正廳曰玉堂蓋道家之名初
李肇翰林志末年居翰苑者皆謂凌玉清遡紫霄
豈止於登瀛洲哉亦曰登玉堂焉自是遂以玉堂
為學士院之稱而不為榜太宗時蘇易簡為學士
上嘗語曰玉堂之設但虛傳其說終未有正名乃

以紅羅飛白玉堂之署四字賜之易簡即扁鐫置
堂上每學士上事始得一開視最為翰林盛事紹
聖間蔡魯公為承旨始奏乞摹就杭州刻榜揭之
以避英廟諱去下二字止曰玉堂云

沈氏筆談曰學士院玉堂太宗皇帝曾親幸至今
唯學士上日許正坐他日皆不敢獨坐故事堂中
設視草臺每草制則具衣冠據臺而坐今不復如
此但存空臺而已玉堂東承旨閣子窓格上有火

燃處太宗嘗夜幸玉堂蘇易簡為學士已寢遽起
無燭具衣冠宮嬪自窓格引燭入照之至今不欲
更易以為玉堂一盛事

洪氏容齋隨筆曰翰苑故事今廢棄無餘惟學士
入朝猶有朱衣院吏雙引至朝堂而止及景靈宮
行香則引至立班處公文至三省不用申狀但尺
紙直書其事右語云諮報尚書省狀候裁旨月日
押謂之諮報此兩事僅存

翰林學士承旨

唐憲宗時始置凡白麻制誥皆內庭代言命輔臣除節將恤災患討不廷則用之宰臣於正衙受付通事舍人

若命相之書則通事舍人承旨皆宣讀訖始下有司

乾寧

二年陸扆以翰林學士承旨拜中書侍郎平章事

後唐天成三年勅今後翰林

學士入院並以先後為定惟承旨一員出自朕意不計官資先後在學士之上仍編入翰林志

宋承旨不常置以學士久次者為之

翰林學士

直院

權直

唐元宗開元二十六年置初以中書務繁乃選文學之士號翰林供奉與集賢學士分掌制誥書命至是改供奉為學士別建學士院專掌內命以張洎劉光謙首居之而集賢所掌於是罷息自後給事中張淑中書舍人張漸竇華等相繼而入焉其後有韓雄閻伯璵孟匡朝陳兼蔣鎮李白等在舊翰林中但假其名而無所職至德已後軍國務殷其入直者並以文辭共掌詔勅自此

北翰林院始無學士之名其後又置東翰林院於金鑾
殿之西隨上之所在而遷取其便穩大抵召入者一二
人或三四人或五六人出於所命蓋不言數亦有以鴻
生碩學經術優長訪問質疑上之所禮者頗列其中初
自德宗建置以來秩序未正延覲之際各超本列暨正
元元年九月始別勅令明預班列與諸司官知制誥例
同故事中書以黃白二麻為綸命重輕之辨近者所出
猶得用黃麻其白麻皆在此院自非國之重事拜授於

德音赦宥者則不得由於斯矣興元元年翰林學士陸
贄奏學士私臣元宗初待詔內庭止於應和詩賦文章
而已詔誥所出本中書舍人之職軍興之際促迫應務
權令學士代之今朝野又寧合歸職分其命將相制詔
請付中書行遣物議是之敬宗以翰林學士崇重不可
褻狎欲別置東頭學士以備曲宴賦詩事未行而帝崩
梁開平三年改思政殿為金鑾殿置大學士一員以敬
翔為之

前朝因金鑾坡以為門名與翰林院相接故為
學士者稱金鑾以美之今以金鑾為名非典也

後唐同光初又置護鑾書制學士以趙鳳為之長興元年翰林學士劉煦奏舊例學士入院除中書舍人即不試餘官皆先試麻制批答詩賦各一道號曰五題後來雖有召試之名無考校之實欲請今後召試新學士權停詩賦祇試麻制批答共三道內賜題目定字數付本院召試從之晉天福五年廢翰林學士院其公事並歸中書舍人開運元年復學士院周顯德五年詔今後當直下直學士並宜令逐日起居其當直學士仍赴晚朝

舊制翰林學士與常參官五日一度起居
世宗欲朝夕賜見訪以時事故有是詔

宋翰林學士無定員凡他官入院未除學士謂之直院
學士俱闕他官暫行文書謂之權直凡奏事用榜子關
白三省樞密院用諮報不名凡初命為學士皆遣使就
第宣詔旨召入院上日勅設會從官侑以樂元豐中始
命佩魚自蒲宗孟始也凡執政議事則繫鞋蓋與待從
異禮也政和三年強淵明請以前後所被旨及案例修
為本院勅令格式五年御書摘文堂榜賜學士院靖康

元年吳玠等奏大禮鎖院麻三道以上係雙宣學士宿直分撰乞依故事從之承旨不常置以學士久次者為之闕員則以他官兼直院或權直自國初至行官制百司事失其實多所釐正獨學士院承唐舊典遵而不改乾道九年崔惇詩初以祕書省正字兼翰林權直淳熙五年惇詩再入院議者以翰林乃應奉之所非專掌制誥之地更為學士院權直後復為翰林權直然亦互除二員紹興間嘗除權與正官至三人

洪氏容齋隨筆曰治平以前謂翰林學士及知制
詔為兩制自翰林罷補外者得端明殿學士謂之
換職熙寧之後乃始為龍圖紹興以來愈不及矣
修起居注者序遷知制誥其次及辭不為者乃為
待制趙康靖馮文簡曾魯公司馬公呂正獻公是
也學士闕則次補或為宰相所不樂者猶得侍讀
學士劉原甫是也在職未久而外除者為樞密直
學士韓魏公是也亦為龍圖直學士歐陽公是也

後來褒擢者僅得待制王時亨是也餘以善去者
集英修撰而止耳

又曰淳熙十四年九月予以雜學士除翰林學士
蔣世修以諫議大夫除御史中丞時施聖與在政
府語同列云此二官不常置今咄咄逼人吾輩皆
自點檢蓋謂其必大用也已而皆不然因考紹興
中所除者不暇縷述姑從壽皇聖帝以後至於紹
熙五年枚數之為學士者九人仲兄文安公史魏

公伯兄文惠公劉忠肅王日嚴王魯公周益公及
予其後李獻之也二兄史劉王周皆擢執政日嚴
以耆老拜端明致仕惟予出補郡獻之遂踵武為
中丞者六人辛企李姚令則黃德潤蔣世修謝昌
國何自然也辛姚黃皆執政惟蔣補郡云

按唐之所謂翰林學士只取文學之人隨其官之
崇卑入院者皆為學士延覲之際則各隨其元官
立班而所謂學士未嘗有一定之品秩也故其尊

貴親遇者號稱內相可以朝夕召對參議政事或
一遷而為宰相而其孤遠新進者或起自初階或
元無出身至試令草麻制甚者或試以詩賦如試
進士之法其人皆呼學士自唐至五代皆然至宋
則始定制資淺者為直院暫行者為權直於是真
為翰林學士者職始顯貴可以比肩臺長舉武政
路矣

翰林侍讀學士

侍讀 兼侍讀

唐元宗開元三年始命馬懷素褚無量更日侍讀

上謂宰相

曰朕每讀書有所疑滯無從質問可選儒學之士使入內侍讀待以師傅之禮十三年置集賢

院侍讀學士侍讀直學士

宋太宗始用著作佐郎呂文仲為侍讀真宗咸平二年以楊徽之夏侯嶠為翰林侍讀學士邢昺為翰林侍講學士始建學士之職其後馮元為翰林侍讀不帶學士又有馬宗元為侍講高若訥為侍讀不加別名但供職而已天禧三年張知白為刑部侍郎充翰林學士知天

雄軍府侍讀學士外使自知白始元豐官制廢翰林侍讀侍講學士不置但為兼官然必侍從以上乃得兼之其秩卑資淺則為說書歲春二月至端午日秋八月至長至日遇隻日入侍邇英閣輪班講讀元祐七年復增學士之號元符元年省建炎元年詔特差侍從官四員充講讀官遇萬機之暇令三省取旨就內殿講讀官觀兼侍讀元豐八年五月資政殿大學士呂公著兼侍讀提舉中太乙宮兼集禧觀公事七月韓維兼侍讀提舉

中太乙宮元祐元年端明殿學士范鎮致仕提舉中大

乙宮兼集禧觀公事兼侍讀不赴六年馮京兼侍讀充

太乙宮使未幾乞致仕不允仍免經筵進讀中興來如

王大資朱丞相

勝非

張大資

浚

謝參政

克家

趙觀文

鼎

萬俟資政

高

並以萬壽觀使兼侍讀隆興元年張大資

燾

以萬壽湯大觀

思退

以醴泉並兼侍讀乾道五年劉

敷制

章

以佑神兼侍讀臺諫兼侍讀自慶歷以來臺丞

多兼侍讀諫長未有兼者紹興十二年春萬俟中丞

羅諫議

楫

始並兼侍讀自後每除言路必兼經筵矣

石林葉氏曰國初侍讀官初無定職但從講官入侍而已宋宣獻夏文莊為侍讀學士始請日讀唐書一傳仍參釋義理後遂為定制

又曰國朝經筵講讀官舊皆坐乾興後始立蓋仁宗時年尚幼坐讀不相聞故起立欲其近爾後遂為故事熙寧初呂申公王荊公為翰林學士吳冲卿知諫院皆兼侍講始建議以為六經言先王之

道講者當賜坐因請復行故事下太常禮院詳定
當韓持國刁景純胡完夫為判院自申公等言蘇
子容龔鼎臣周孟陽及禮官王汾劉攽韓忠彥以
為講讀官曰侍蓋侍天子非師道也且講讀官一
等侍讀仍班侍講上令侍講坐而侍讀立不應為
二申公等議遂格今講讀官初入皆坐賜茶唯當
講時起就案立講畢復就坐賜湯而退侍讀亦如
之蓋乾興之制也

翰林侍講學士

侍講 兼侍講

漢顯宗時張酺數侍講於御前張酺侍靈帝以楊賜有重名舉賜侍講於華光殿中又詔劉寬拜太中大夫侍講華光殿雖有侍講之號而未以名官至唐開元十三

年始置

詳見侍
讀門

宋咸平二年國子祭酒邢昺為侍講學士其後又有馬宗元為侍講不加別名但供職而已景德四年以翰林侍講學士邢昺知曹州侍講學士外使自昺始元豐以

後官制

見侍讀門

故事自兩省臺端以上並兼侍講元祐中

司馬公休以著作佐郎兼侍講時朝議以文正公之賢

故特有是命

朝野雜記

紹興五年范元長以宗卿朱子發以

祕少並兼蓋殊命也乾道六年張敬夫始復以吏部員

外郎兼蓋中興後庶官兼侍講者惟此二人若紹興二

十五年張扶以祭酒隆興二年王宣子佐以檢正乾道

七年林景度以宗卿入經筵亦兼侍講者蓋扶本以言

路兼說書就陞其秩宣子時攝版曹景度嘗為右史且

有敬夫舊例故稍優之皆有以也熙寧元年龔鼎臣蘇頌劉攽等議不當坐講疏朝廷班制以侍講居侍讀下

會要

臺諫兼侍講慶歷二年召御史中丞賈昌朝侍講邇

英閣故事臺丞無在經筵者上以昌朝長於講說特召

之

仁宗實錄

神宗用呂正獻亦止命時赴講筵去學士職中

興後王尚書賔為御史中丞建請復開經筵遂命兼侍

講自後十五年間繼之者惟王唐公徐師川二人皆上

意也紹興十二年春万俟卨

高

羅諫議

檄並兼講讀

紹興二十五年春董殿院王正言

珉

並兼侍講非臺丞

諫長而以侍講為稱又自此始其後猶或兼說書臺官

自尹穡隆興二年五月諫官自詹元宗乾道九年十二

月後並以侍講為稱不復兼說書矣

朝野雜記

修注兼侍講

自朱子發後修注官多得兼侍講嘉泰二年八月林伯

玉自殿中侍御史兼侍講除起居郎其年閏十二月鄧

伯允自右正言兼侍講除起居舍人伯玉改兼權刑侍

伯允改兼史編實討非故典也開禧元年八月婁彥開

自言路徙奉常兼權中書舍人亦以史院易經筵遂為定例三年十月朱仲文自司諫改奉常兼講如故意者以其兼權史侍故也十一月王簡卿知諫院為左史仍兼崇政殿說書言者猶以為不可罷之嘉定元年黃伯

庸自右正言兼侍講除起居舍人兼知舊今故典矣

自渡

江以後惟王樞密綸以右史兼說書其他無此

宮觀兼侍講國初自元豐以來

多以宮觀兼侍讀乾道七年寶文閣待制胡銓除提舉佑神觀兼侍講是日以宰執進呈虞允文奏曰胡銓早

歲一節甚高謂當濶畧錄其氣節不宜令遽去朝廷上
曰銓固非他人比且除在京宮觀留侍經筵故有是命

崇政殿說書

兼說書 經筵附

古無此官宋朝仁宗景祐元年正月命賈昌朝趙希言
王宗道楊安國並為崇政殿說書日輪二員祇候初侍
講學士孫奭年老乞外因薦昌朝等至是特置此職以
命之慶歷二年以趙師民預講官復為崇政殿說書蓋
秩卑資淺則為說書不兼侍講元祐間程正叔以布衣

為之然范淳夫乃以著作佐郎兼侍講司馬公休又嘗

以著作佐郎兼侍講前此未有也

趙師明家塾記

崇寧中初除

說書二人皆以隱逸起蔡崇呂瓘仍遂其性詔以士服

隨班朝謁入侍渡江後尹彥明初以祕書兼之中間王

龜齡范至能皆以郎官兼亦殊命也

朝野雜記

近事侍從以

上兼經筵則曰侍講庶官則曰崇政殿說書故左史兼

亦曰侍講如程敦厚趙衛是也

周益公集

臺諫兼說書紹興

十二年春万俟中丞

高

羅諫議

檄

並兼講讀蓋秦楚材

梓是時已兼說書便於傳道自後伯陽繼之每除言路

必與經筵矣檜死罷兼

自二十五年十月至三十二年臺丞諫長兼經筵者止三人

慶元後臺丞諫長暨副端正言司諫已上無不預經筵

者正言兼說書自端明巫伋始副端兼說書自端明余

堯弼始察官兼說書自少卿陳夔始

朝野雜記

修注兼說書

自朱子發修注官多得兼侍講開禧三年十一月王簡卿知諫院為左史仍兼崇政殿說書言者以為不可罷之

吳氏能改齋漫錄曰王荊公所作賈魏公神道碑
示景祐元年積官至尚書都官員外郎乃始置崇
政殿說書而以公為之然予按傳簡公佳話云太
祖少親戎事性好藝文即位未幾召山人郭無為
於崇政殿講書至今講官所領階銜猶曰崇政殿
說書云據傳簡公所言則崇政殿說書不始於仁
宗景祐元年矣豈中嘗罷之而至是再建邪

右翰苑經筵在近代為至清要顯美之官而杜岐

公通典敘職官獨闕焉蓋學士講讀之官皆始於唐開元之時講讀隸集賢殿故通典於集賢學士條下附載而翰林學士唐史志以為獨無所隸然自開元建學士院之後居之者多名流至號內相乃畧不敘述則為闕事矣古人有一事必有一官曹雖歷代沿革不同而所掌之事則一也故通典所載唐所置之官而前代無之者則敘其所掌之事以通於前代如通事舍人唐所制也而其事則

秦漢以來謁者之任也集賢殿書院唐置也而其
事則漢魏以來祕書省之職也然則翰林學士之
官獨不可通之於前代乎蓋以言語文字被顧問
以翰墨技藝侍中待詔則漢武帝所以處鄒枚嚴
徐靈帝所以招鴻都文學之類是也至於出入禁
闥特被親遇參謀軍國號稱內相則漢魏以來侍
中領尚書事祕書監中書監之類是也若代言典
誥之任則武帝所以命司馬相如歷代所以置中

書舍人是也但學士院之官所職叢雜不一而其位亦高卑不等唐多以他官兼之中世以後則所掌者制詔而已至宋則又以唐所置集賢殿講讀之官隸之元豐官制既行而講讀始去翰林之名自為經筵之官矣故以經筵附見學士院之後存其舊也

總學士

宋朝殿學士有觀文殿大學士學士資政殿大學士學

士端明殿學士殿學士資望極峻無吏守無典掌惟出入侍從備顧問而已觀文殿大學士非曾為宰相不除觀文殿學士資政殿大學士及學士並以寵輔臣之去位者端明殿學士惟學士久次者始除近歲以待簽樞云

觀文殿大學士

學士

宋朝觀文殿即舊日延恩殿也慶歷七年以文明殿學士稱呼同真宗謚號乃改名紫宸殿後又以紫宸殿非

人臣所可稱呼乃以延恩殿更名觀文殿皇祐元年詔置觀文殿大學士寵待舊相今後須曾任宰相乃得除授時賈昌朝由使相右僕射觀文殿大學士判尚書都省觀文殿置大學士自昌朝始三年詔班在觀文殿學士之前六尚書之上自是曾任宰相者出必為大學士熙寧中韓絳宣撫陝西河東得罪罷守本官四年用明堂敕授觀文殿學士宰相不為大學士自絳始中興後非宰相而除者自紹興二十年秦熺始熺知樞密院郊

祀大禮使禮成以學士遷且視儀揆路非典故也乾道四年汪徹舊以樞密使為學士遷九年王炎以樞密使為西川安撫使除至慶元間趙彥逾自工部尚書為端明殿學士直以序遷至焉曾為宰相而不為大學士者自紹興元年范宗尹始

觀文殿隋煬帝殿名宋初為文明殿學士慶歷七年宋庠言文明殿學士稱呼同真宗謚號兼禁中無此殿額其學士理自當罷乞擇見今正朝或祕殿以名

學士乃詔改為紫宸殿學士以參知政事丁度為之時學士多以殿名為官稱丁遂稱曰丁紫宸八年御史何郯以紫宸不可為官稱於是改延恩殿為觀文

殿

歐陽公云觀文乃隋煬殿名理宜避之蓋當時不知然則朝廷之上不可以無學也

即殿名

置學士

呂氏家塾廣記云觀文殿學士位資政殿學士上蓋初置觀文殿學士職時已有為大資

政者故於上加此美職朝廷亦知不當以學士壓大學士但常有人充此二職者故久而不能革正可因無人為此二

職時正之也

以丁度為之自後非曾任執政者弗除

熙寧中王韶以熙河功元豐中王陶以宮僚未歷三

府亦除是職蓋異恩也詔猶兼端明殿龍圖學士云

資政殿大學士

學士

國朝資政殿在龍圖閣之東序景德二年王欽若罷參

政真宗特置資政殿學士以寵之在翰林學士下

欽若不悅

訴於上曰臣向自翰林學士拜參知政事今無罪而罷班反在下是貶也真宗特改置大學士以處之

十

二月復以欽若為資政殿大學士班在文明殿學士之

下翰林學士承旨之上資政殿置大學士自欽若始自

冀公班翰林承旨上一時以為殊寵祥符初向文簡公

以前宰相再入為東宮留守復加此職自是訖天聖末
二十餘年不以除人明道元年李文定公知河陽召還
始再命之景祐四年王沂公罷相復除三十年間除三
人而皆前宰相也宋宣獻公罷參知政事仁宗眷之厚
因如此職自冀公後非宰相而除者惟宣獻一人而已
康定二年右正言梁適請遵先朝故事定以員數於是
詔大學士置二員學士三員紹興十年鄭億年歸自偽
庭除資政殿二年加大學士許出入如二府儀億年未

嘗秉政十五年秦熈自翰林學士承旨為資政詔立班
恩數同執政十六年秦檜弟梓以端明卒於湖州進大
資致仕卹典同參政是後從臣自端明視政府而序進
者遂為常矣

端明殿學士

端明殿即西京正衙殿也後唐天成元年明宗即位之
初四方書奏命樞密使安重誨進讀牒於文義孔循獻
議始置端明殿學士命馮道趙鳳俱以翰林學士充班

在翰林學士上後有轉改止於翰林學士內選任初如
三館例職在官下趙鳳轉侍郎諷任園特移職在官上
後遂為故事晉天福五年廢開運元年復

宋朝太宗時程侍郎羽為之後隨殿名改為文明殿學

士慶歷中改文明為紫宸後改紫宸為觀文

其改置本
未見觀文

殿學士門明道二年改承明殿為端明殿復置端明殿學士

以翰林侍讀學士宋綬為之

詔畧曰方獎拔於名儒特
增新於近職俾參顧問益

廣謀
猷

在翰林學士之下自明道訖元豐無前執政為之

者近來以待學士之久次者元豐中以前執政為之自

曾孝寬始

孝寬前為簽書樞密院

以見任執政為之自王安禮始

安禮自尚書左丞為之知江寧並見續會要

政和中嘗改為延康殿建炎二

年都省言延寧殿學士舊係端明殿學士詔依舊近拜簽樞者多領焉

總閣學士直學士

宋朝庶官之外別加職名所以厲行義文學之士高以備顧問其次與論議典校讐得之為榮選擇尤精元豐

中修三省寺監之制其職並罷滿歲補外然後加恩兼

職直龍圖閣省郎寺監長貳補外或領監司帥臣則除

之待制雜學士給諫以上補外則除之係一時恩旨非

有必得之理

劉忠肅公奏議又言待制學士祖宗以來極天下之選不為定員今不考治行不察

流品幸而給諫以上則計日得之乞依元豐官制施行

元祐二年詔增復館職及

職事官並許帶職尚書二年加直學士中丞侍郎給舍

諫議通及一年加待制紹聖三年詔職事官罷帶職非

職事之官仍舊中興後學士率以授中司列曹尚書翰

林學士之補外者權尚書給諫侍郎則帶直學士待制
總待制

唐永徽中命弘文館學士二人日待制於武德殿西門
文明元年詔京官五品以上清官日一人待制於章善
明福門先天末又命朝集使六品以上二人隨仗待制
永泰時勲臣罷節制無職事皆待制於集賢門凡十三
人特給餐錢以優其禮崔祐甫為相建議文官六品以
上更直待制其後著令正待制官日二人備顧問仍有

公廨永泰元年敕裴冕等並集賢待制此始有待制之所然則蓋唐設官也

宋朝景德元年置龍圖閣待制以杜鎬戚綸充並依舊充職祥符二年詔班視知制誥列其下元祐令從四品

掌侍從備顧問有所獻納則請到或奏對劉摯言待制

學士之選太濫

見學士門

王巖叟亦言待制祖宗之時其選

最精出入朝廷纔一二人今立法無定員將一年待制滿朝必有車載斗量之謠

龍圖閣

學士

直學士

待制

宋朝大中祥符中建龍圖閣在會慶殿西偏北連禁中閣東曰資政殿西曰述古殿閣上以奉太宗御書御製文集及典籍圖書寶瑞之物及宗正寺所進屬籍世譜有學士直學士待制直閣學士大中祥符三年置以杜鎬為之班在樞密直學士之上六年詔結銜在本官之上

直學士景德四年置以杜鎬為之班在樞密直學士之

下祥符六年詔結銜在本官之上

待制景德元年置以杜鎬戚綸為之並依舊充職四年詔班在知制誥之下並赴內殿起居自改官制為學士初復之職或知制誥平出除之

天章閣 學士 直學士 待制

宋朝天禧四年初建天章閣在會慶殿之西龍圖閣之北明年仁宗即位修天章閣工畢奏真宗御製安於天章閣東曰羣玉殿西曰藥珠殿北曰壽昌殿南曰延康

殿內以桃花文石為流杯之所在位受天書祥符改
曰天章取為章於天之義天聖八年置待制慶歷七年
又置學士直學士又有侍講學士慶歷七年初置在龍
圖閣學士之下學士罕以命人迄仁宗世纔王執事一人
官制舊典云天章閣只除待制不除學士難稱呼也秦堪自顯謨閣進直天章閣
以稱呼非便辭詔改龍圖自是天章不為帶職

直學士慶歷七年初置天章閣直學士在龍圖閣直學
士之下

年神宗即位始置學士直學士待制恩賜如龍圖英宗

御書附於閣

會要宏
詞編題

其學士治平四年初置以呂公著

兼

直學士治平四年初置以邵必為之

待制治平四年初置

顯謨閣

學士

直學士

待制

宋朝元符元年曾布鄧洵仁各申請建閣詔翰林學士
中書舍人撰閣名五以聞續建閣藏神宗御集以顯謨

待制天聖八年初置寓直於祕閣與龍圖遞宿尋命范
諷鞠詠充職中興後圖籍符瑞寶玩之物若國史宗正
寺所進屬籍獨藏於天章閣祖宗御容潛邸旌節亦安
奉焉

寶文閣

學士 直學士 待制

宋朝寶文閣在天章閣之東西序羣玉藥珠殿之北即
舊日壽昌閣慶歷改曰寶文嘉祐八年英宗即位詔以
仁宗御書御集藏於寶文閣命王珪撰記立名治平四

待制

敷文閣

學士

直學士

待制

紹興十年置藏徽宗聖製置學士等官

煥章閣

學士

直學士

待制

淳熙間建藏高宗御製學士等官並十五年置

華文閣

學士

直學士

待制

慶元二年置藏孝宗御製置學士等官

寶謨閣

學士

直學士

待制

為名

神宗大新政事故以
王顯文王謨為名

徽宗建中靖國元年詔以顯

謨閣為熙明閣仍置學士直學士待制續奉旨仍以顯

謨為額

此據周益公宏詞編題而續會要云復顯謨舊
名年月無考按次年已詔顯謨閣學士直學士

如三閣故事復名顯
謨則恐在此年矣

崇寧元年詔顯謨閣學士直學士

待制如三閣故事序位在寶文閣學士直學士待制之
下學士直學士待制並建中靖國元年置

徽猷閣

學士直學士待制

大觀二年初建徽猷閣以藏哲宗御集置學士直學士

嘉泰二年置藏光宗御製置學士等官

寶章閣

學士 直學士 待制

寶慶二年置藏寧宗御製置學士等官

總閣職

宋朝祖宗以來重之有集賢殿修撰

後改右文殿

直龍圖閣

直祕閣三等政和四年二浙福建諸路監司郡守往往交通內官多以應奉有勞遷職遂有未嘗朝覲天子因忽為待制班從官者蔡京不樂六年因增其目置修撰

與舊為三等曰集英殿修撰右文殿修撰祕閣修撰直
閣與舊為六等曰直龍圖閣天章寶文顯謨徽猷祕閣
朝廷除授自此密矣舊貼職無雜壓至是因增置乃定
為雜壓蔡攸國史外補紹興十年置直敷文閣淳熙十五年置
直煥章閣淳熙令自集撰至直祕閣為貼職中興後直
閣為庶官任藩閫監司者貼職各隨高下而等差之

集英殿修撰

唐張昌齡為北門修撰孫逖為集賢院修撰修撰之名

始於唐

宋政和六年置集英殿修撰其增置來歷見貼職門中興後以寵六曹權侍郎之補外者下待制一等

右文殿修撰

唐有集賢院修撰

宋朝元祐元年貼職許內外官帶五年九月詔復置集賢院學士紹聖二年四月詔職事官罷帶職易集賢院學士為集賢院修撰政和六年四月御筆集賢院無此

名祕書省殿以右文殿為名見任集賢殿修撰並改作
右文殿修撰其職次於集英殿撰為貼職之高等

祕閣修撰

政和六年置

見貼職門

貼職修撰以待館閣之資深者仍多

由直龍圖閣遷焉

直龍圖閣

直天章閣以下附

祥符九年以馮元為太子中允直龍圖閣直閣之名始
此凡除館職之久次者必選直龍圖閣皆為擢待制之

基也

直天章閣 直寶文閣 直顯謨閣 直徽猷閣

並政

和六年置

直敷文閣

紹興十年置

直煥章閣

淳熙十年置

直

華文閣

慶元二年置

直寶謨閣

嘉泰二年置

直寶章閣

寶慶

二年置

直祕閣

宋朝以史館昭文館集賢院為三館皆寓崇文院太宗端拱元年詔就崇文院中堂建祕閣擇三館真本書籍

萬餘卷及內出古畫墨跡藏其中以右司諫直史館宋
泌為直祕閣直館直院則謂之館職以他官兼者謂之
貼職元豐以前凡狀元制科一任還即試詩賦各一而
入否則用大臣薦而試謂之入館官制行廢崇文院為
祕書監建祕閣於中自監少至正字列為職事官罷直
館直院之名獨以直祕閣為貼職皆不試而除蓋特以
為恩數而已

石林燕語又故事外官除館職如祕閣校理直祕閣者必先移書在省執事敘同寮

之好乃即館設盛會燕之自崇寧以來外官除館既多此禮寢廢

容齋洪氏隨筆曰國朝館閣之選皆天下英俊然
必試而後命一經此職遂為名流其高者曰集賢
殿修撰史館修撰直龍圖閣直昭文館史館集賢
院祕閣次日集賢祕閣校理官卑者曰館閣校勘
史館檢討均謂之館職記注官缺必於此取之非
經修注未有直除知制誥者官至員外郎則任之
中外皆稱為學士及元豐官制行凡帶職者皆遷
一官而罷之而置祕書省官大抵與職事官等反

為留滯政和以後增修撰直閣貼職為九等於是
才能治辦之吏貴游乳臭之子車載斗量其名益
輕南渡以來初除校書正字往往召試雖曰館職
不卑然其遷敘反不若寺監之逕捷至推排為郎
即失其故步混然無別矣

又曰宋朝儒館仍唐制有四曰昭文館曰史館曰
集賢院曰祕閣率以上相領昭文大學士其次監
修國史其次領集賢若只兩相則首廳兼國史惟

祕閣最低故但以兩制判之四局各置直官均謂
之館職皆稱學士其下則為校理檢討校勘地望
清切非名流不得處范景仁為館閣校勘當遷校
理宰相龐籍言范鎮有異才恬於進取乃除直祕
閣司馬公作詩賀之曰延閣屹中天積書雲漢連
神宗重其選謂太宗也國士比為仙玉檻勾陳上丹梯
北斗邊帝容瞻日角宸翰照星躔職秩曾無貴光
華在得賢其重如此自熙寧以來或頗用賞勞元

豐官制行不置昭文集賢以史館入著作局而直
祕閣只為貼職至崇寧政宣以處大臣子弟姻戚
其濫及於錢穀文俗吏士大夫不復貴重然除此
職者必詣館下拜閣乃具盛筵邀見在三館者宴
集秋日暴書宴皆得預席若餘日則不許至隨筆
有館職名存一則云

按學士待制二官始於唐皆以處清望儒臣俾備
顧問其初既無專職亦無定員宋因其制而以三

館為儲才之地故職名猶多元豐新官制其職名
之元不附麗於三省寺監者皆從廢革然除昭文
集賢二學士元麗中書門下省外獨翰林學士一
官在唐已無所係屬而最為清要故不可廢而諸
學士待制則以其為三館清流未欲遽廢故以為
朝臣補外加恩之官蓋有同於階官而初無職掌
矣龍圖閣為儲祖宗制作之所故其官視三館自
後列聖相承代代有宸奎之閣而建官亦如之於

是學士直學士待制直閣之官始不可勝計矣野處譏其濫及俗吏童駭然職名既多自不容不濫

施也又所謂學士直閣者尊卑不同故難槩稱如

文為宰相資政為執政端明為簽書龍圖以下為尚書然皆學士也直龍圖煥章等閣為藩閫監司

之貼職直祕閣則卑於諸閣然皆直閣也

於是舍學士直閣之名而就

以所掌殿閣呼之遂有丁紫宸秦天章之稱則以為名稱非便而改以他殿閣然所謂端明龍圖顯謨敷文煥章之類亦俱非人臣之稱謂流傳既久

曰某端明曰某龍圖不覺其非宜耳昭文集賢元
隸兩省既已敘其事於各門殿閣學士待制與翰
林學士元皆無所附隸故敘殿閣於翰林之後



文獻通考卷五十四

欽定四庫全書

史部

文獻通考卷五十六

詳校官內閣學士臣尹壯圖

編修臣程嘉謨覆勘

覆校官中書臣施光輅

校對官庶吉士臣陳墉

謄錄監生臣章玉植

謄錄監生臣龍翔

欽定四庫全書

文獻通考卷五十五

鄱陽馬端臨貴與著

職官考九

諸卿少卿

夏制九卿

記曰夏后氏官百天子有三公九卿也亦有六卿殷周皆然

殷亦九卿

尹

曰三公調陰陽九卿通寒暑

周之九卿卽少師少傅少保冢宰司徒

宗伯司馬司寇司空

二代諸卿雖名號不同然其官職相沿與周不異說在歷代官制篇

漢以太常光祿勳衛尉太僕廷尉大鴻臚宗正大司農

少府謂之九寺大卿後漢九卿而分屬三司

太常光祿勳衛尉三

卿並太尉所部太僕廷尉大鴻臚三卿並司徒所部宗正大司農少府三卿並司空所部

多進為三

公各有署曹掾史隨事為員九卿有疾使者臨問加賜

錢布

尚書令陳忠常欲褒崇大臣故奏建此禮

魏九卿與漢同

九卿名數與漢同

晉

以太常等九卿

即漢九卿

兼將作大匠太后三卿大長秋皆

為列卿各置丞功曹主簿五官等員太康四年增九卿

禮秩

元帝以賀循為太常而散騎常侍如故循以九卿舊不加官惟拜太常而已

宋齊及梁

初皆因舊制

宋卿尹皆銀章青綬進賢兩梁冠佩水蒼玉衛尉則武官晉服制以九卿皆文冠乃

進賢兩梁冠非舊也

梁武帝天監七年以太常卿加置宗正卿以

大司農為司農卿三卿是為春卿加置太府卿以少府為少府卿加置太僕卿三卿是為夏卿以衛尉為衛尉卿廷尉為廷尉卿將作大匠為大匠卿三卿是為秋卿以光祿勳為光祿卿大鴻臚為鴻臚卿都水使者為大舟卿三卿是為冬卿凡十二卿皆置丞及功曹主簿後魏又以太常光祿勳衛尉謂之三卿太僕廷尉大鴻臚

宗正大司農少府為六卿各有少卿

太和十五年初置少卿官常同大卿

北齊以太常光祿衛尉宗正太僕大理鴻臚司農太府

是為九寺

晉荀勗曰九寺可併於尚書後魏亦有三府九寺則九卿稱寺久矣然通異名不連官號

其官寺連稱自北齊始也

置卿少卿丞各一人各有功曹五官主簿

錄事等員隋九寺與北齊同

自昔三代以上分置六卿至周明備至秦及漢雖事

不師古猶制度未繁後漢有三公九卿而尚書之任又益重矣魏晉以降職制日增後周依周禮置六官而年代短促人情相習已久不能革其視聽故隋氏復廢六官多依北齊之制官職重設庶務煩滯如六尚書似周之六卿又更別立寺監則戶部與太府分地官司徒職事禮部與太常分春官宗伯職事刑部與大理分秋官

職事工部與將作分冬官司空職事自餘煬帝降光祿百司之任多類於斯欲求理要實在簡省

以下八寺卿階品於太常而少卿各加置二人

始開皇中諸司

署惟典掌受納至煬帝署令為判首取二卿同判丞惟知檢局令闕丞判

唐九寺與北齊同

卿各一人少卿各二人丞以下有差龍朔二年改九寺

之名凡卿皆加正

若太常卿為奉常正卿他皆如此

後各復舊

宋初雖有九卿皆以為命官之品秩而無職事元豐正名始有職掌中興初併省冗職除太常寺大理寺不罷外宗正以太常兼而衛尉太僕併兵部太府司農併戶

部光祿鴻臚併禮部紹興復置宗正太府司農餘遂廢

太常卿

少卿

丞

主簿

博士

太祝

奉禮

郎 協律郎

兩京郊社署

太樂署

鼓吹署

太醫署

太卜署

廩犧署

汾祠

署

今太常者亦唐虞伯夷為秩宗兼夔典樂之任也周時

曰宗伯為春官掌邦禮秦改曰奉常漢初曰太常欲令

國家盛太常存故稱太常

顏師古曰太常者王之旌也畫日月馬王者有大事則建

以行禮官主奉持之故曰奉

惠帝更名奉常景帝六年

更名太常

惠帝時叔孫通為奉常定宗廟儀法及定漢儀法皆叔孫通所著論也王莽改太常卿為

秩宗後漢秩與漢同每祭祀前奏其禮儀及行事贊天子

每選試博士奏其能否大射養老大喪皆奏其儀每月
前晦察行陵廟助祭則平冕七旒漢舊常以列侯忠敬
孝慎者居之後漢不必侯也舊制陵縣悉屬歲舉孝廉
後漢則否建安中為奉常魏黃初元年改為太常魏晉
皆銀章青綬進賢兩梁冠絳朝服佩水蒼玉宋齊皆有
之舊用列曹尚書好遷選曹尚書領護梁視金紫光祿
大夫陳因之後魏為上卿兼置小卿官

周禮有小宗伯
中大夫二人即

其北齊曰太常寺置卿及少卿丞各一人掌陵廟羣祀

禮樂儀制天文術數衣冠之屬後周建六官置大宗伯

卿一人

掌邦禮以佐皇帝和邦國

是為春官隋曰太常與北齊同煬

帝加置少卿二人唐因之龍朔二年改太常為奉常

少卿

丞隨寺名改光祿以下同

咸亨元年復舊光宅元年改太常為司禮

神龍初復舊卿一人掌禮儀祭祀總判寺事少卿二人

通判

餘寺少卿職並同太常少卿本一員神龍中加一員

領丞一人主簿二人博

士四人太祝二人奉禮郎協律郎各二人齋郎五百五

十二人

其餘小吏各有差

郊祀太公廟大樂鼓吹太醫太卜廩

犧等署各有令

其郊社及太公廟兩京皆有

宋初太常寺皆以禁林之長主判

續會要云皆以兩制充

而禮院

自有判院同判院祥符中祥瑞繁縟別建禮儀院輔臣

主判而知制誥為知院天禧末罷知院天聖中省禮儀

院而寺與禮院事舊不相兼康定元年置判寺同判寺

並兼禮儀事元豐正名始專其職焉卿掌禮樂郊廟社

稷壇壝陵寢之事

禮之名有五吉賓軍嘉凶皆掌其制度儀式祭祀有大祠有中祠有小祠

其犧牲幣玉酒薦獻器服名辨其等掌樂律樂舞樂章
凡親祠及四孟月朝獻景靈宮郊祀太廟掌贊相禮儀
升降之節及朝會燕享上壽封冊之儀若禮樂有損益
及祀典神祇爵號與封襲繼嗣之事常考定者擬上於
禮部凡太醫政令以時頒行

元祐詔太常寺置長貳餘寺監長貳並

互置中興併省寺監獨存太常又命太常兼宗正紹興
復隆興元年詔光祿寺併歸太常寺兼領掌社稷及武

成王廟諸壇齋官習樂之事丞一員罷卿舊不除人

紹興

三十五年除張扶執政以為言遂改宗正復言少卿元

祐初除呂純禮御史論門蔭得官不可任奉常於是外

補建炎初并省冗職詔太常少卿一員兼宗正少卿

初國

太常少卿博士寺丞俱為寄祿官少卿後來為朝議大夫博士丞議郎丞奉議郎

丞秦置一人漢多以博士議郎為之後漢凡諸丞皆掌

行禮及祭祀小事總署曹事舉廟中非法皆銅印墨綬

進賢兩梁冠

職官要錄曰晉宋九卿丞皆進賢一梁冠介幘皐衣銅印黃綬齊梁墨綬

歷代

皆有

常弘為太常丞父賢以弘當嗣太常職掌陵廟煩劇多過勅弘自免及賢疾篤弘坐廟事繫獄

梁

舊用員外郎遷尚書郎天監七年改視尚書郎陳因之

後魏北齊亦有之隋有二人唐因之分判寺事

餘寺丞職並同

宋皇祐中詔特差近上知禮官一員兼承事建炎三年省紹興復置

主簿漢有之

漢鹵簿之制太常駕四馬主簿前車八乘

魏晉亦有焉梁天監

七年十二卿各置主簿一人陳因之北齊有功曹五官

主簿二人

歷代諸主簿多說在列職篇

唐置二人掌付事勾稽省署

抄目監印給紙筆等事

餘寺主簿並同職

宋皇祐中宋祁乞增置一員勾檢在寺文書及掌出納遂除胡瑗後省不置元豐正名初除王子奇建炎三年

省紹興十年復置

容齋洪氏隨筆曰自元豐官制行九寺五監各置主簿專以掌勾考簿書為職他不得預紹聖初韓粹彥為光祿主簿自言今輒預寺事非先帝意也請如元豐詔書從之如玉牒脩書主簿不預見於王定國雜錄予猶及見紹興中太府寺公狀文移惟卿丞繫銜後來掌故之吏昧於典章遂一切與丞等今百官庶府皆戾官制非特此一事也

博士魏官也魏文帝初置晉因之掌引導乘輿王公以

下應追諡者則博士議定之

秦有博士數十人兩漢太常屬官皆有博士掌以五

經教子弟則今國子博士是也說在本篇

端委佩玉朝之大典必於詢度歷

代皆有隋有四人唐因之甚為清選資位與補闕同掌

撰五禮儀注導引乘輿贊相祭祀定誅諡及守祧廟開

閉埴室及祥瑞之事

宋祥符中置博士二員後四員元豐正名初除何洵直

博士掌講定五禮儀式有改革則據經審議凡於法應

諡考其行狀撰定諡文有祠事則監視儀物掌凡贊道之事中興省丞簿而太常博士如故紹興九年諫議大夫曾統言祖宗朝太常博士四員今見一員添置一員隆興元年從王太寶等議併省博士一員

太祝殷官與太宰等官為六太周官太祝下大夫二人上士四人掌六祝之辭以祈福祥秦漢有太祝令丞後漢亦曰太祝令丞晉宋齊梁陳後魏北齊皆因之後周依周官至隋置太祝署太祝令丞煬帝罷署太祝八人

唐初有七人後增為九人開元二十三年減置三人掌讀祝文出納神主

宋太祝奉禮郎掌奏祭祀闕則承奏蔭京官十六以上

未掌事者充郊社掌坐齋郎無員數

富韓公之父質甚客呂文穆門下一

日白公曰某兒子十許歲欲令入書院事廷評太祝李文靖公為相治第隘甚或以為公言曰居第當傳子孫此為宰相廳事誠隘為太祝奉禮廳事已寬矣蓋三官皆宰相子弟初蔭之官也

奉禮郎漢大鴻臚有理禮郎四十七人晉理禮郎四人屬大行令後魏理禮郎四人北齊有奉禮郎三十人屬

鴻臚寺之司儀署後周有理禮中士下士各一人隋有奉禮郎十六人屬太常寺煬帝減至六人唐初有理禮郎四員掌設板位執儀行事至永徽二年以廟諱改為奉禮郎開元二十三年減二員

奉禮本名理禮國家撰五代史志至永徽七年

乃成於時此官已改故隋書百官志謂北齊及隋時理禮皆為奉禮奉禮之名雖見於前史其改始自永徽

宋奉禮郎品秩見前掌奉幣帛授初獻官大禮則設親祠板位大祀掌讀冊授搏黍以嘏告餘福則進爵酌酒受其虛爵

協律郎漢曰協律都尉李延年為之

武帝以李延年善新聲故為此官

後漢亦有之魏杜夔亦為之

魏武平荊州初得杜夔知音識舊故為此官

晉

改為協律校尉後魏有協律郎又有協律中郎北齊及隋協律郎皆二人唐因之掌舉麾節樂調和律呂監試樂人典課

宋協律郎朝宴親郊則遣官攝事崇寧後協律郎隸大晟府又有按協聲律製撰文字運譜等官以京朝官選又或白衣士人通樂律者為之

兩京郊社署周官有典祀掌以時祭祀秦漢有太祝令
丞屬奉常景帝改為祠祀武帝更曰廟祀後漢祠祀屬
少府魏晉有太祝令丞宋曰明堂令丞掌祀五帝之事
齊有太祝及明堂二令梁有明堂太社二令並屬太常
北齊太廟令兼領郊祀崇虛二丞
郊祀掌五郊羣神崇
虛掌五嶽四瀆神
後周有司郊上士中士司社中士下士隋太常寺置郊
社署令丞各一人唐因之掌郊祀明堂祠祀祈禱及茅
土衣冠等事

宋嘉祐元年置郊社令命石祖元為之熙寧元年郊社

局令張伯世言合有郊社名而不主四郊之事於是始

主四郊壇壝之事

按唐六典兩京郊社局令各一人掌五郊社稷明堂之位然則郊社令通

管五郊之事乞自今兼令勾當四郊壇壝之事使得巡視提舉所貴官正其名郊兆常潔從之郊社令掌巡視四郊及社稷之壇壝掌凡掃除之事祭社則省牲渡江初闕紹興十九年始除

韓彥直為太社令請給並依五監主簿例

太樂署周官有大司樂掌成均之法亦謂之樂尹以樂

舞教國子

左傳楚鍾建為樂尹即大司樂也

秦漢奉常屬官有太樂令

及丞又少府屬官并有樂府令丞後漢永平三年改太

樂為大予樂令掌伎樂人凡國祭饗掌諸奏樂

盧植禮注云大

予令如古大胥漢大樂律卑者之子不得舞宗廟之酌除吏二千石到六百石及闕內侯到五大夫子取適子高五尺以上年十二到三十顏色和順身體循禮者為舞人魏復曰太樂令丞晉亦

有之齊銅印墨綬進賢一梁冠絳朝服

齊太樂及諸陵令永明末置用

二品三品勲置主簿戶曹六品保舉

梁陳因之後魏置太樂博士北齊曰

大樂令丞後周有大司樂掌成均之法後改為樂部有

上士中士隋有太樂令丞各一人唐因之掌習音樂樂

人簿籍

宋制太樂局令一人丞一人樂正二人副使正二人掌車駕郊祀及御殿御樓大祠登歌徽宗時置大晟府以大司樂為長典樂為貳次曰太樂令秩比丞次曰主簿曰協律郎又有按協聲律製撰文字運譜等官以京朝官選又或白衣士人通樂律者為之又以武臣監府門及太樂法物庫以待從及內省近侍官提舉所典六案曰太樂曰鼓吹曰宴樂曰法樂曰知雜曰掌法京朝禮

樂掌於奉常崇寧初置局議太樂樂成置府建官以司之禮樂始分為二四年詔曰廼者得隱逸之士於草茅之賤獲英莖之器於受命之邦適時之宜以身為度鑄鼎以起律因律以制器親賜樂名曰大晟府舊樂勿用五年二月因省冗員併之禮官九月復舊大觀四年以官徒廩給繁厚樂令一員監官二員吏祿並視太常格宣和二年詔以大晟府近歲添置冗濫徼幸並罷

鼓吹署周禮有鼓人掌六鼓四金之音後漢有承華令

典黃門鼓吹屬少府晉置鼓吹令丞屬太常元帝省太樂并鼓吹哀帝復省鼓吹而存太樂梁有鼓吹令丞又有清商署北齊鼓吹令丞及清商署並屬太常隋有鼓吹清商二令丞至煬帝罷清商署唐鼓吹署令丞各一人所掌頗與太樂同

宋鼓吹局令一人丞一人崇寧後隸大晟府

詳見太樂署

太醫署周官有醫師上士下士掌醫之政令秦兩漢有太醫令丞亦主醫藥屬少府

後漢又有醫丞有醫工長

魏因之晉銅

印墨綬進賢一梁冠絳朝服而屬宗正過江省宗正而屬門下省宋齊隸侍中梁陳因之後魏有大醫博士助教北齊又曰太醫令丞後周太醫下大夫隋太醫署令二人唐因之主醫藥凡領醫針灸按摩咒禁各有博士五代時有翰林醫官使

宋制翰林醫官院使副各二人並領院事以尚藥奉御充或有加諸司使者直院四人尚藥奉御六人醫官醫學祇候無定員

舊制翰林醫官使四人副使二人直院七人尚藥奉御七人醫官三十人醫學

四十人祇候醫人十二人其員猥多寶元二年始立使副直院尚藥奉御定員醫官醫學無班位以服色為差加同正官至尚藥奉御者或加檢校官其直院則奉御及同正官皆為之多自醫官特獎而授掌供奉

醫藥及承詔視療衆疾之事典二人徽宗時置翰林院

勾當官一員以內侍省押班都知充總天文書藝圖書

醫官四局崇寧元年詔醫官有勞轉皇城使實及五年

方許除遙郡刺史又七年除遙郡團練又十年以上方

許除遙郡防禦使醫官有和安成和成安成全大夫

軍器庫使

保和大夫

舊為西綾錦使

保安大夫

舊為樞密使

翰林良醫

舊為

翰林醫官使

和安成和成安成全郎

舊為軍器庫副使

保和郎

舊為西綾

錦副使

保安郎

舊為樞密副使

翰林醫正

舊為翰林醫官副使

翰林醫官翰林

醫效翰林醫痊翰林醫愈翰林醫證翰林醫診翰林

醫候翰林醫學舊諸司使副有醫官使及副使蓋自太

醫丞直院轉醫官副使叙遷年格一同武官但為東班

使額耳

謂自法酒庫以上至皇城使

政和初既易武階而醫官之名

亦遂易焉凡十有九階立和安大夫視樞密使以上翰

林良醫視醫官使其和安郎以下視東副使若醫官副

使則以醫正易之

官制舊典云此名皆大臣所撰無所稽據傳曰登高能賦可以為大夫今

乃以雜流為之可見當時大臣之不學也

舊額和安大夫至良醫二十員紹

興二年五員和安郎至醫官元額三十員紹興二年四員醫效元額七員紹興二員醫痊元額十員今一員醫愈至祇候大方脉元額百五十員紹興十五員而已

太卜署殷官太卜為六大周官太卜掌三兆之法秦漢有太卜令後漢并於太史自後無聞後魏有卜博士北齊有太卜局丞後周有太卜大夫小卜上士龜占中士

隋曰太卜令丞一人唐因之

宋以太卜隸司天臺然不置專官

廩犧署周禮有牧人掌牧六牲以供祭祀秦漢內史左
馮翊廩犧令丞並掌犧牲鴈鶩後屬大司農後漢河南
尹屬官有廩犧丞魏晉宋齊梁陳後魏北齊隋皆有之
唐令丞各一人掌犧牲染盛之事

汾祠署齊太公廟署並有令丞各一人唐開元中置

宗廩犧屬光祿寺有牛羊司供應所掌大中小祀牲牷

及太官宴享膳饌之用監官三人以諸司使副及三班使臣充監棧園三人以三班使臣充

光祿卿

少卿良醞署

丞

主簿掌醞署

大官署

珍饈署

秦有郎中令

主郎內諸官故曰郎中令

掌宮殿掖門戶漢因之

石建為郎

中令秦事事已下建省讀驚曰書馬者與尾而五今乃不足一獲譴死矣其謹慎如此

至武帝太

初元年更名光祿勳

應劭曰光明也祿爵也勳功也如淳曰勳之言閤也閤古主門之官

光祿主官門故也張安世為光祿勳郎有醉小便殿上主事行法安世曰何以知其不覆水也其隱人過失如此王莽時乃改後漢曰光祿勳所掌同典三署郎更直光祿勳為司中

執戟宿衛考其德行而進退之

漢東京三署即有德應四科者歲舉茂才二人

四行二人及三署即罷省光祿勳猶依舊舉四行衣冠子弟以充之

郊祀之事掌三獻光

祿勳居禁中

如宋之殿中御史

有獄在殿門外謂之光祿外部

兩漢自光祿大中中散諫議等大夫及謁者僕射羽林

郎郎中侍郎五官武賁左右等中郎將奉車附馬二都

尉軍戶騎三將

如淳曰主車曰車郎主戶衛曰戶郎

並屬光祿勳

後漢張湛字子

孝拜光祿勳光武臨朝或有惰容湛輒陳諫其失又杜林字伯山為光祿勳內供奉宿衛外總三署周密敬慎選舉稱平即有好學者輒見誘進朝夕蒲堂士以此高而慕附又荀爽為光祿勳視事三日冊拜司空

建

安末復改光祿勳為郎中令魏黃初元年復為光祿勳
東晉哀帝興寧二年省光祿勳併司徒孝武寧康元年
復置自魏晉以後無復三署郎而光祿不復居禁中唯
外官朝會則以名到焉二臺奏劾則符光祿加禁止解
禁止亦如之

禁入殿省光祿
主殿門故也

其宮殿門戶至宋文猶屬

焉梁除勳字謂之光祿卿卿舊視列曹尚書天監中視
中庶子職與漢同後魏又置少卿北齊曰光祿寺置卿
少卿兼掌諸膳食帳幕隋文帝開皇三年廢光祿寺入

司農十二年復置初有卿及少卿各一人煬帝加置二

少卿

唯取漢代舊名
而其職則別

唐龍朔二年改光祿寺為司宰寺

咸亨初復舊光宅元年為司膳神龍初復舊卿一人掌
終獻行事少卿二人領太官珍饈良醞掌醢等四署署
各有令丞

丞漢二人多以博士議郎為之後漢一人魏晉因之銅

印黃綬梁陳視員外郎

其員外說在通直
散騎常侍郎中

後魏北齊並

有之隋有三人唐置二人

主簿漢置晉宋齊梁陳並有之北齊曰功曹五官主簿
隋二人唐因之

宋光祿寺判寺事一人以朝官以上充古者其屬有太
官珍饈良醢掌醢四局令分隸御厨法酒庫古者祭祀
則省牲鑊濯漑三公攝祭為終獻今並以他官攝本寺
但掌供祠祭酒醴果實醢醢菹薪炭及點饌進胙之事
卿少卿丞為寄祿官卿後來為中奉大夫少卿朝儀大
夫丞宣義郎元豐官制行置卿少卿丞主簿各一人元

祐三年詔長貳互置政和六年監察御史王桓等言祭祀牲牢之具掌於光祿而寺官未嘗臨視請太祠以長貳朔祭及中祠以丞簿監視宰割禮畢頒胙有故及小祠聽以其屬攝從之中興後廢光祿併入禮部

太官署令丞於周官為膳夫庖人外饗中士下士蓋其任也秦為太官令丞屬少府兩漢因之桓帝延熹元年使太官令得補二千石魏亦屬少府晉屬光祿勳宋齊屬侍中梁門下省領太官陳因之後魏分太官為尚食

中尚食知御膳隸門下省而太官掌百官之饌屬光祿卿北齊因之後周有典庖中士內膳中士隋如北齊唐因之各一人

宋朝隸御厨勾當官五人以朝官并諸司使副內侍都知押班充掌供御之膳饌及內外饗餼割烹煎和素膳之事元祐初罷太官令二年復置崇寧二年置尚食局太官令惟掌祠事

珍饈署令丞周官籩人掌四籩之實蓋其任也後漢少

府屬官有甘丞主膳具晉太官令有錫官果官吏各二人自後無聞北齊饒藏令屬光祿寺後周有饒藏中士下士隋如北齊唐因之長安中改為珍饈神龍初復舊開元初又改之有令丞各一人

宋珍饈署隸御厨有供備庫

太平興國二年改為內物料庫

有使及副

使掌供尚食及內外膳饈米麵飴蜜棗豆百品之料監官二人以三班及內侍充監門一人以三班充外物料庫掌給皇城外諸宮院油鹽米麵之品監官二人以三

班內侍充

良醞署令丞於周官有酒正中士下士掌酒之政令後漢湯官丞主酒屬少府晉有酒丞一人齊食官局有酒吏梁曰酒庫丞北齊有清漳令丞主酒後周如古周之制隋曰良醞署令丞各一人唐因之

宋良醞署屬御厨有內酒坊使掌造法糯酒常料之三等酒以供邦國之用監官三人監門二人以三班內侍充都麴院掌造麴以給內酒坊之用及出鬻而收其直

監官二人以京朝官及諸司使副內侍充法酒庫掌造

供御及祠祭

周太祖平河中得酒工王思善造法麴因立法酒庫置之

凡祭祀供五

齊三酒以實罇罍監官二人以朝臣及三班使臣內侍充

掌醢署令丞於周官有醢人掌四豆之實自後無聞至齊諸公府有釀食典軍二人後周有掌醢中士下士隋曰掌醢署令丞各一人唐因之

宋屬御厨有油醋庫監官一人以京朝官充掌造油醢

載以供邦國膳饌内外之用

衛尉卿

丞主簿武庫令丞武器令丞
宮署公車司馬令左右都候附

衛尉秦官掌門衛屯兵漢因之

漢舊儀曰衛尉寺在宮
內胡廣云主宮闕之內

衛寺於周垣下為區
廬者若今之仗宿屋

景帝初更名中大夫令後元年復

為衛尉又有長樂建章甘泉衛尉皆掌其宮其職畧同

而不常置

顏師古曰各隨所
掌之宮以為官名

後漢有衛尉卿一人職與

漢同晉銀章青綬五時朝服武官佩水蒼玉掌治鑄領

治金

凡領五千三百五十治在江北而江南唯
有梅根及冶塘二治皆屬揚州不屬衛尉

晉江左

不置衛尉宋孝武復置南齊掌宮城管鑰

後漢張衡西京賦曰衛尉

入屯以警夜巡南齊宮城諸却敵樓上本施鼓持夜者以應更唱高帝以鼓多警眠遂改以鐵磬

梁衛

尉卿位視侍中職與漢同卿每月丞每旬行宮徼糾察不法陳因之後魏亦有之北齊為衛尉寺有卿及少卿各一人隋文帝開元三年廢衛尉寺入太常及尚書省十三年復置掌軍器儀仗帳幕之事而以監門衛掌宮門屯兵唐因之龍朔二年改衛尉為司衛咸亨初復舊光宅元年又改為衛尉神龍初復舊卿一人少卿二人

初少卿一人太極元年加一人

領武庫武器守宮三署署各有令丞秦

漢多以博士議郎為之後漢一人魏晉並同宋孝武增置一人梁亦有之後魏北齊並有隋因之唐置二人主簿一人漢衛尉駕四馬主簿前車以乘晉有衛尉主簿二人宋齊梁陳因之北齊隋亦有二人唐因之

宋衛尉寺判寺事一人以郎官以上充凡武庫武器並歸內庫及軍器庫以他官及內侍典領守宮歸儀鸞司本寺無所掌卿少卿丞皆為寄祿官卿後來為中奉太

夫少卿奉直大夫寺丞宣義郎元豐官制行置卿少卿
丞主簿各一人卿掌儀衛兵械甲冑之政令少卿為之
貳丞參領之凡內外作坊輸納兵器則辨其名數驗其
良窳以歸於武庫不如式者罰之時其曝涼而封籍其
數若進御及頒給則按籍而出之每季委官檢視歲終
上計帳於兵部掌凡幄帟之事大禮設帷宮張大次小
次陳鹵簿儀仗長貳晝夜巡徼察其不如儀者押仗官
則前期稟差凡仗衛供羽儀節鉞金鼓棨戟朝會亦如

之宴享賓客供幕帟茵席視其敝者移少府軍器監脩
焉分案四置吏十元祐三年詔長貳互置所隸官司十
有三內弓箭庫南外庫軍器衣甲庫軍器弓槍之庫軍
器弩劍箭庫掌藏兵仗器械甲冑以備軍國之用儀鸞
司掌供幕帟供帳之事軍器什物庫宣德樓什物庫掌
收貯什物給用則按籍而頒之左右金吾衛司六軍儀
仗司掌清道徼巡排列奉引儀仗以肅禁衛凡儀物以
時脩飾選募人兵而校其遷補之事

政和五年詔金吾
衛仗司依格差武

冀大夫
以上

中興後廢衛尉并入工部

武庫令丞於周官司甲司弓矢等下大夫司戈盾等中
士下士蓋其任也兩漢曰武庫令屬執金吾後漢又有
考工令丞屬太僕主造兵器成付武庫令魏晉因之晉
後屬衛尉宋齊武庫令丞屬尚書庫部梁陳屬衛尉卿
北齊亦有後周如周官隋如北齊唐因之各一人天寶
六載四月敕改儀制令廟社門宮門每門各二十戟東
宮每門各十八戟一品門十六戟嗣王郡王若上柱國

帶職事二品散官光祿大夫以上鎮國大將軍以上各
同職事品及京兆河南太原府大都督大都護門十四
戟上柱國帶職事三品上護軍帶職事二品若中都督
上都護門十二戟國公及上護軍帶職事三品若下都
督諸州門各十戟並官給貞元五年十二月中書門下
奏應請列戟官准儀制令正一品開府儀同三司嗣王
郡王并勲官上柱國柱國等帶職事三品以上並許列
戟准天寶六載四月勅文加散官光祿大夫鎮國大將

軍以上各同職事品近日散試官便帶高階者衆恐須商量者伏請准舊制令本文取帶三品以上正員職事為定勅旨依

武器署令丞隋行臺尚書省有武器監令唐永徽中始置各一人掌祭祀及朝會巡幸及公卿婚葬鹵簿之事宋武庫武器並歸內庫及軍器庫以他官及內時典領軍器凡四庫勾當官並二人衣甲弓槍弩劍三庫悉以諸司使副及內侍充什物庫以三班使臣充掌禁兵器

鎧甲供軍什器儲侍之物辨其出納

守宮署漢有守宮令丞掌御紙筆墨及諸財用并封泥之事屬少府晉及北齊屬光祿勳北齊守宮令掌張設之事梁陳屬大匠卿隋屬衛尉寺唐置令一人掌諸鋪設帳幕氍毹床薦几席之事

廣德二年二月勅文京兆府諸司諸使幕士工匠總

八萬四千五百人數內宜月支二千九百四十四人仍令河東關內諸州府據戶口分配不得偏出京兆府餘

八萬一千一百一十四人並停

宋守宮署歸儀鸞司儀鸞司勾當官四人以諸司使副

及內侍充掌奉輿親祠郊廟朝會巡幸宴饗及內庭供帳之事凡三庫一曰金銀器皿帟幕什物二曰香燭

三曰氊油床椅鐵器雜物監門二人以三班使臣充

公車司馬令秦屬衛尉漢因之掌殿司馬門夜徼宮中

天下上章四方貢獻及闕下凡所徵召公車者皆總領

之漢張釋之為公車令時景帝與太子梁王共車入朝不下司馬門釋之遂劾其不敬文帝免冠謝太后太

后詔赦之然後漢有丞一人丞選曉諱掌知非法尉主

闕門兵禁戒非常胡廣曰諸門部各陳屯夾道其旁設兵以示威武交節戟以遮誤出入也

晉江左以來直曰公車令宋以後屬侍中隋有公車署

置令丞唐無

左右都候

周禮司寤氏有夜士千寶注曰今都候之屬

後漢各一人主劍戟

士徼循宮及天子有所收考

官中諸有詔奏罪左都候執戟戲車縛送付詔獄在

宮大小各付所屬見尚書令僕射尚書皆執版拜見即對揖

屬衛尉後無

宗正卿

少卿太廟令

丞

主簿

崇元署

諸陵署

周官小宗伯掌三族之別以辨其親疏秦置宗正掌親屬漢因之更以叙九族平帝元始四年更名宗正五年

又於郡國置宗師以糾皇室親族世氏致教訓焉選有德義者為之有寃失職者宗師得因郵亭上書宗伯請

以聞

為書付郵亭令送至宗伯

常以正月賜宗伯帛十匹王莽併宗

伯於秩宗後漢曰宗正卿一人掌序錄王國嫡庶之次

及諸皇室親屬遠近郡國歲因計上皇族名籍若有犯

法當髡以上先上諸宗正宗正以聞乃報決

胡廣曰宗正又歲一

理諸王世譜差叙秩第髡枯昆切

兩漢皆以皇族為之不以他族

楚元王子

鄙各劉辟疆劉德等迭為此官又後漢書曰劉軫字君文梁孝王之允為宗正卒官遂世掌焉魏亦然

晉兼以庶姓

山公啓事曰羊祜忠篤寬厚然不長理劇宗正卿缺不審可轉作否

咸寧三

年又置宗師以扶風王亮為之使皇室戚屬奉率德義

所有施行必令誥之

梁王彤亦為宗師

東晉省之屬太常

桓溫奏省

宋齊不置宗正梁天監七年復置之視列曹尚書主皇

室外戚之籍以皇族為之陳因之後魏有宗正卿少卿

北齊亦然後周有宗師中大夫

掌皇族定世系辨昭穆訓以孝悌

屬大

冢宰隋如北齊之制唐龍朔二年改為司宗咸亨元年

復舊光宅元年改為司屬神龍初復舊卿一人少卿二

人

初少卿一人太極元年加置一人

掌皇族外戚簿籍及邑司名帳領

崇元署及諸陵太廟開元二十五年制宗正等寺官屬皆以皇族為之

宋宗正寺判寺事二人以宗姓兩制以上充闕則以宗姓朝官以上知丞事掌奉宗廟諸陵薦享之事司皇族之籍大宗正司知司事二人以皇親團練觀察使以上充掌敦睦皇族教導宗子受其陳請辯訟之事及糾過

失而達之朝廷

景祐三年始置司以皇兄寧江軍節度使濮王知大宗正事皇姪彰化軍節度

觀察留後守節修玉牒官無定員掌修皇帝玉牒序宗
同知大宗正事

派紀族屬歲撰宗子名以進

舊隸宗正寺景祐中言者以玉牒與國史相通後以

史官兼

又有睦親廣親宅都大管勾三人以內侍充元豐

六年詔宗正寺長貳不專用國姓蓋自有大宗正司以

統皇族也中興後卿一人不常置少卿一人以太常兼

三年復置少卿一員嘉定九年詔以宗學改隸宗正寺

自此寺官又預考校之事大宗正司知及同知官各一

人丞二人官屬有記室一人熙寧三年始以異姓朝臣

二員知承事置局於睦親廣親宅是歲省管勾睦親廣親及提舉郡縣主等宅官以其事歸宗正崇寧三年置南外宗正司在南京西外宗正司在西京各置敦宗院中興後以位高屬尊者為判大宗正事如舊制以宗室團練以上有德望者充又置知大宗正丞一員以文人充掌糾合宗室而檢防之訓飭之凡南班宗室磨勘遷轉襲封請給核其當否嫁娶房奩分析財產酌厚薄多寡而訂其議凡宗室除合該賜名外皆大宗正定名而

後報宗正寺其餘遷授官資支給錢米考核以詔予奪其不率教者以法拘之歲久知悔則除其過名分按六署吏十有二又有南外宗正司西外宗正司以處宗室之在外者各仍舊制設厚宗院皆設知宗仍以所在通判職官兼丞簿其糾合檢防訓飭如大宗正司西南外兩司闕知宗間令大宗正司選擇保明而後授之又各置教授以課其行藝初建炎南幸先徙宗室於江淮於是大宗正司移江寧南外移鎮江西外移揚州其後屢

徙後西外止於福南外止於泉又有紹興府宗正司蓋
初隨其所寓而分管轄之乾道七年嘗欲移紹興府宗
正司於蜀不果後歸併行在嘉定間用臣僚言乞凡除
授知宗須擇老成更練之人詔知宗宗丞照百司例每
日入局所以示增重宗盟之意

玉牒所淳化六年始設局置官倣唐制也詔以皇宋玉
牒為名建玉牒殿宇新寺九年以知制誥劉筠夏竦為
修玉牒官自後置一員或二員

朱勝非秀水閑居錄本
朝國書嚴奉寶藏未有

如王牒者用金花紅羅標黃金軸至神宗朝以軸大難於披閱詔為黃金梵夾又以黃金為匣鎖鑰皆金也進呈畢安奉於宗正寺王牒殿士大夫罕有知其制度者予頃在朝廷因宗正丞謝汲自本寺事論及王牒問宰執諸公制度趙元鼎曰不過刻如王冊耳予曰國家宗文之蓄自古無之每朝為一牒宗室官稱名行女與其夫皆錄之以玉刊不其難乎又中興系年錄注每朝為一牒乃載人主系序及歷年行事如帝紀而差詳其後附以皇后事迹親王宗室子女則有宗蕃慶系錄仙源類譜仙源積慶圖三書詳焉非同為一牒也王牒則奉安於玉牒殿類譜則安於屬籍堂勝非亦少誤

景祐元年宗正寺脩王牒官

李淑申請詔以編脩院廳西閣子充脩纂王牒之所

李淑

言前脩王牒官馮允亦是兼編脩會要蓋緣國史王牒事節須要照會所以只就編脩院修纂熙寧三

年玉牒於三班院置局後徙編脩院皇帝玉牒十年一進脩玉牒官並以學士典領自元豐行官制分隸宗正寺官六年詔宗正寺脩玉牒照用日歷所文字並指定所書事令本所節錄元符二年宗正寺丞陳覺民乞將先帝玉牒內聖政令本寺修玉牒官抄寫封送國史院從之紹興十二年襲舊制始建以宰臣一人提舉脩玉牒官一人以侍從兼凡宗正卿少而下悉與脩纂二十年詔玉牒所併入宗正寺更不置脩玉牒官檢討官

以本寺少卿及丞同領編脩事詔王牒所宰臣提舉依舊脩書官一員同宗正卿丞修纂更不置檢討官紹興三十二年詔尚書左僕射陳康伯提舉編脩王牒後或以參知政事簽書樞密院事兼權提舉

乾道元年錢端禮以參政兼權

蔣芾以簽樞兼權見玉牒所題名記

故事王牒以首相領之自後相府有

闕則以首參兼領仍帶權字淳熙十五年王丞相淮去位周益公以右揆兼領時勅令所纔罷而首參仲至無兼局益公乃奏乞以仲至權提舉王牒宰相在位而執

政權領寶訓王歷自此始也

丞漢亦用皇族後漢一人

劉茂字子衛為宗正丞

歷代皆有之隋

有二人唐因之

宋初為寄祿官後改為奉議郎元豐正官名詔宗正寺

除長貳外自今後更不專差國姓

以楊畏趙君錫為之

建炎三年

罷紹興五年復置

主簿梁置陳北齊隋皆有唐因之置一人

宋天禧時以衛尉丞兼元豐正名初除楊完建炎三年

罷紹興十年復置

崇元置令一人初後魏天興二年置仙人博士掌煮煉
百藥北齊置昭元等寺掌諸佛教有大統一人都維那
三人兼置功曹主簿等員以管諸州縣沙門之法後周
置司寂上士中士掌法門之政又置司元中士下士掌
道門之政隋初置崇元署令丞至煬帝改郡縣佛寺為
道場置道場監一人改觀為元壇監一人唐復置崇元
署初又每寺觀各置監一人屬鴻臚貞觀中省開元中

以崇元署隸宗正寺掌觀及道士女冠簿籍齋醮之事

令一人正八品下丞一人正九品下

有府二人史三人典事六人掌固二

人崇元學博士一人學生百人隋以署隸鴻臚又有道
場元壇唐置諸寺觀監隸鴻臚寺每寺觀有監一人貞
觀中廢寺觀監上元二年置漆園監尋廢開元二十五
年置崇元學於元元皇帝廟天寶元年兩京置博士助
教各一員學生百人每祠享以學生代齋卽二載改崇
元學曰崇賢館博士曰學士助教曰直學士置大學士
二人以宰相為之領兩京元元宮及道院改天下崇元
學為通道學博士曰道德博士未幾而罷寶應永泰間
學生存者無幾大歷三年復增至百人初天下僧尼道
士女冠皆隸鴻臚寺武后延載元年以僧尼隸祠部開
元二十四年道士女冠隸宗正寺天寶二載以道士隸
司封貞元四年崇元館罷大學士後復置左右衛大功

德使東都功德使總僧尼之籍及功役元和二年以道士女官隸左右衛功德使會昌二年以僧尼隸主客太清宮置元元館亦有學士至六年廢而僧尼復隸兩衛功德使

宋自真宗興崇道教置玉清昭應宮景靈宮會靈觀使以宰相為之副使判官都監及集禧觀醴泉觀東西太一宮提舉則以兩省兩制丞郎及防禦諸司使副為之掌奉齋醮之事又有譯經潤文使亦以宰相為之熙寧以後增置祠祿之官以尊老優賢而時相欲以宮觀之祿處不奉行新法之人遂無限員亦無職事而釋老之

事則如歷代領之祠部郎官又屬鴻臚寺至徽宗時以道敎改隸秘書省置道階自六字先生至額外鑒義品秩比視中大夫至將仕郎凡二十六等又置道學升貢及三歲大比法同科舉應天下神霄玉清萬壽宮天慶觀知及副知將來有聞並以學校登科人充其餘宮觀亦依此令禮部署名籍差注如吏部法以蔡攸通行提舉道錄院中興後道釋敎門事仍歸祠部

按崇元署一官唐創之以司道敎而必屬之宗正

司者蓋唐以老氏為始祖則崇其教者亦以為尊
祖宗之事也杜氏通典所載凡唐所創之官而前
代所無者則必叙其所掌之事以通之於前代如
崇元一官前代無之然興崇二教而為之建立官
司則非始於唐也故必叙後魏所置仙人博士北
齊所置昭元寺之類以先之愚又嘗欲以宋所創
之官而通之於唐如崇元署宋雖無其官然亦嘗
興崇道教為之置立官司張皇而推獎之矣故以

真徽兩廟所置玉清景靈宮使副及都提舉道錄院等事附見焉然唐則專主以一官而其品秩稍卑宋雖不專置官而常以宰相貴官兼之但天寶間所置崇元館大學士二人以宰相為之則又景靈玉清宮使譯經使所取法也

諸陵園寢官漢置屬太常

長陵令秩二千石為高祖陵也故尊其秩

元帝永

光元年分諸陵邑屬三輔

史記曰司馬相如為孝文園令

後漢每陵園

令各一人掌按行掃除丞及校長各一人

校長主戒盜賊

晉宋

皆曰令而梁初為監後亦改為令梁以下皆有之唐每陵令丞各一人初屬太常開元二十五年並屬宗正寺宋以宗正寺知丞事掌奉宗廟諸陵薦享之事

諸廟寢園令長丞漢置

宋志曰漢西京曰長東京曰令

晉有太廟令宋

太廟令領齋郎二十四人齊梁以下皆有

後魏有太常齋郎漢書曰

田千秋為高廟寢郎

舊屬太常唐開元二十五年二月勅宗廟所

奉尊敬之極因以名署情所未安宜令禮官詳擇所宜奏聞至五月太常少卿韋緇奏曰謹詳經典兼尋令式

宗廟享薦皆主奉常別置署司事非稽古其太廟署請
廢省本司專奉其事許之二十五年勅宗正設官實司
屬籍而陵寢崇敬宗廟惟嚴割隸太常殊乖本系奉先
之旨深所未妥自今以後諸廟署並隸宗正寺

宋以宗正寺知承事掌奉宗廟諸陵薦享之事室長齋
郎無常數廟直官一人太廟后廟宮闈令三人以入內
內侍充元豐後太廟令屬宗正寺掌宗廟薦新祀及

功臣從享之禮

品秩與大社
籍田令同

文獻通考卷五十五